

佛說拔除罪障呪王經
唐三藏法師義淨奉 制譯

如是我聞：一時薄伽梵在淨居天上為諸大眾說微妙法，是時曼殊室利菩薩摩訶薩於大眾中即從座起，偏袒右肩，右膝著地，合掌向佛，瞻仰尊容，目未暫捨而白佛言：世尊！此大法門甚深微妙，實為希有，然於當來五濁惡世時，惡業眾生具貪恚癡，欺誑不信，樂行非法，不修戒品，專行諂偽；彼等於呪法所有威力神通變化，於諸國土隨其方處，念誦儀軌，祭祠方法，奉持者獲益，得功德成就，皆不信受，亦不奉行，謂非佛說而為謗毀，惡障纏心，命終之後，墮大地獄，受大苦惱，無有出期。世尊！此等眾生既遭大苦，云何救護？唯願慈悲拔濟令出。爾時釋迦牟尼如來即舒右手摩曼殊室利法王子頂而告言：善哉！曼殊室利！汝為利益一切有情，問於如來如是義利。汝今諦聽！極善作意！我今為汝說此呪法，安樂人天，利益一切，於諸呪法中最为殊勝，祕密甚深，順菩提道，依真法界，獲大功德，於臨終時必能憶此大力呪王，正念現前，當生善處。即說呪曰：

喃莫薩嚩怛他(引)伽帝弊喻(二合引)阿囉訶捺弊藥(三合)三藐三沒第(引)弊喻(二合引)唵(引)俱摩(引)囉嚧彬尾濕嚩(二合)三婆尾(引)阿(引)揭車阿(引)揭車擺呼擺呼勃嚕唵(二合)勃嚕唵(二合)吽吽爾那爾迦(半音)曼殊室利(二合引)曳(引)蘇室哩(二合引)曳(引)多(引)囉也唵(引)薩嚩度契(引)弊藥(二合)頗吒(半音)頗吒(半音)苦麼也苦麼也阿弭都(引)捺鉢(二合引)耶(引)叟(引)捺婆(二合)嚩波(引)跋謎(引)那(引)捨也娑嚩(二合引)訶(引)

Namaḥ sarva tathāgatebhyo arhadbhyaḥ samyak-saṃbuddhebhyo.
Om, kumāra-rūpin viśva-saṃbhava ā-gaccha ā-gaccha, lahu lahu,
bhrom bhrom huṃ huṃ jina-jik, mañjuśrīye su-śrīye tāraya māṃ,
sarva duḥkhebhyaḥ phaṭ phaṭ, śamaya śamaya, amitod-pāyāsod-
bhava pāpa me nāśaya svāhā.

曼殊室利！此即是汝最勝根本心王神呪，能除一切苦惱厄難，諸惡罪障悉皆銷滅，長壽無疾，富樂無窮，言詞聰辯，眾人愛敬，亦能通利一切呪王。時釋迦牟尼如來說是語時，諸佛刹土及此大地山河江海盡有情界六種震動，一切惡趣餓鬼傍生，琰魔王界地獄有情，苦惱停息，皆得安樂。佛復告曼殊室利：若天、若人、若男、若女、在家、出家諸有情類，若能至心受持此呪王者，不被惡人之所欺謗，魔不

得便，怨不能害，毒不能傷，一切障礙毘那夜迦皆自退散。其受持者應起此心：諸佛世尊難思議法，唯佛與佛乃能證知，我今豈敢輒生誹謗。

爾時世尊說此法已，彼諸大眾并淨居天，及餘諸天，無量百千俱胝天、龍、藥叉、健達婆、阿蘇羅等，禁呪成就諸大仙人，及曼殊室利法王子，觀自在菩薩，慈氏菩薩，大勢至菩薩，執金剛菩薩，如是等諸大菩薩，及阿僧祇世界諸佛刹土一切如來并諸菩薩皆共證知，此大呪王為不思議法，是大神呪，是大明呪，是無上呪，是無等等呪，能除罪障苦，真實不虛。爾時諸天大眾聞佛說此呪王已，皆大歡喜，頂戴奉持。

佛說拔除罪障呪王經

【經文資訊】大正新脩大藏經第 21 冊 No. 1396 佛說拔除罪障呪王經

【版本記錄】CBETA 電子佛典 Rev. 1.5 (Big5)，完成日期：2006/04/12

【編輯說明】本資料庫由中華電子佛典協會（CBETA）依大正新脩大藏經所編輯

【原始資料】蕭鎮國大德提供，北美某大德提供

【其他事項】本資料庫可自由免費流通，詳細內容請參閱【中華電子佛典協會版權宣告】

公元二零一三年五月二十七日馬來西亞萬撓佛教會蔡文端居士修訂。